

唐  
文  
拾  
遺

唐文拾遺卷之四十八

榮祿大夫三品頂戴前分巡廣東高廉道加四級臣陸心源輯

王宗弼

宗弼本姓魏名宏夫前蜀王建錄爲假子更姓名官至中書令封齊王後族誅

奉魏王牋

昨蜀主與將校同議歸欵其僞樞密使宋光嗣景潤澄南院宣徽使李周恪北院宣徽使歐陽晃等四人同出異謀惑亂蜀主臣當時梟首以徇謹令送納

冊府

危德輿

德輿楊吳時人

有吳太僕卿檢校尚書左僕射舒州刺史彭城

劉公夫人故尋陽長公主墓誌銘

并序

夫甘露降醴泉生則知顯國祚識明朝使四方服我  
聖后度其時甘醴應瑞叶祥乃長公主焉公主則弘  
農楊氏大吳太祖之令女國家閨室之長也太祖以  
劍斷楚虵手揮秦鹿建吳都之宮闕復隋氏之山河  
功蓋鴻溝變家爲國編史載籍其可盡乎是知玉樹  
盤根聳金枝而繁茂銀漢通口瀉天派以靈長將符  
碩大之詩必誕肅雍之德太后王氏坤儀毓秀麟趾

彰才旣諧典慶之祥乃產英奇之女卽尋陽長公主  
也公主蓬邱降麗桂影融華稚齒而聰惠出倫笄年  
而名口頴衆旣明且哲早聞柳絮之詩以孝兼慈夙  
著椒花之頌國家詳觀令淑用偶賢良敦求闊閱之  
門須慕裴王之族我彭城大卿代承勲業世茂英雄  
先君首匡社稷於吳朝尋擁麾幢於江夏繇是王恭  
鶴氅迥出品流衛玠神清果符僉議蓋標奇於枏象  
遂應兆於牽牛潛膺坦腹之姿妙契東床之選我公  
主輜輶降于天漢鸞鳳集於閨門在內也則班誠曹  
箴克修女範配室也則如賓舉按罔怠婦儀奉蘋藻

以恭勤佩萑蘭而芬馥常遜言而撫育每恪謹以事  
親寬慈則僕隸不鞭娣姒則仁明是敬星霜滯撫慈  
愛無渝助君子之宜家實諸侯之令室皆公主之賢  
達也而況敦睦氏族泛愛宗親不以公聞之貴驕人  
不以奢華之榮傲物旣而榮光內外道合鸞凰感吉  
夢於熊羆肇芳華於桃李育男六育女六長子曰匡  
祚受鎮南將軍節度討擊使撫州軍事押衙銀青光  
祿大卿檢校國子祭酒兼侍御史上柱國貌方冠玉  
才蘊鏗金雅承慶於鯉庭叶好述於虎帳乃娉于撫  
州都指揮使司空太原王公之愛女也王氏以綵閣

襲美蘭閨傳馨克奉孝慈肅恭禮敬次曰匡業試秘書省校書郎光融氣秀瑜潤德清纔親秘閣之風益顯侯門之美聘雄武統軍潁川侍中之愛女卽陳氏焉雖通四德之規未展二儀之禮次曰匡遠匡禹匡舜嚴老並幼而岷嶷志定堅剛蘭牙卽俟於國香驥子伫追於駿足長女年富有字容謂無雙娉婷融薜槿之英婉戀叶絲蘿之詠適柯氏柯氏受右軍討擊使詩書立性禮樂臻身鄧艾晝營必引遠大劉琨夜舞定建殊功次女納鍾氏禮鍾氏器重珪璋材親廊廟入仕纔趨於宦路登龍必履於朝廷任洪州南昌

縣主簿喜氣雖通於銀漢雲車未會於鵲橋次女四  
並天資柔惠神授冲和端分瑤萼之華慶稟瓊枝之  
秀苟非公主義方垂訓秉範整儀峻清問於聖朝著  
聲光於王闕則缺以順義六年中春太僕卿自洪井  
副車袂滿皇恩降命除郡臨川隼旟方耀於章江熊  
軾俄臨於汝水入境已聞於靜理下車頓肅於山川  
四郊而襁負還鄉万井而飛蝗出境豈止懸魚著詠  
佩犢推名可以與杜邵齊肩共龔黃並轡公主同駟  
繡轂內助政經佐褰帷露冕之功贊察俗撫民之化  
或發言善諫則惠馥蘭芳或靜慮澄機則珠圓月皎

俾連營將士皆欽如母之謠此屋黎民咸戴二天之  
惠豈料霜凋瓊樹月墜幽泉祥雲易散於長空彩鳳  
難留於碧落嗚呼鬚髮方盛薜顏未央俄夢蝶於莊  
生忽貽災於彭矯爰從寢疾遽致膏肓賸理難明歟  
歸冥寞何期天道曾不愍遺以順義七年七月廿六  
日薨於臨川郡城公署享年三十八歲箕箒二十二  
春悲乎自有古今不無生死奈其修短禍福難裁何  
神理之微茫曷榮枯之倏忽我太僕卿以鸞分隻影  
劍躍孤鳴痛哽襟靈韻悲琴瑟自是政行千里聲徹  
九重別擁旌旄去迎綸綍奉親王之傳印寵亞前朝



承聖上之優恩榮超太古公主權叢福地傍揖魏壇  
而大卿亟赴名邦正臨瀟嶽諸子以情鍾陟屺恨切  
如荼哀號而泣血崩心踊擗而柴身骨立吁嗟遐邇  
駭嘆人倫里巷爲之輟春士民爲之罷社則以乾貞  
三年二月二日符護靈柩以其年三月廿四日窆于  
都城江都縣興寧鄉東袁墅村建義里莊西北源式  
建封樹禮也舉朝祭奠傾國塗葛送終之禮越常厚  
葬之儀罕及所謂缺乎我彭城公代著八元家傳五  
鼎榮駟貔虎坐擁囊韃據康樂之城池播廉公之襦  
袴則何以名光傳粉譽振傳香偶良匹於龍宮見起

家於鵲印不有謫戚曷光令猷所謂類以相從合爲  
具美者也德輿識學荒蕪躬承厚命直旌厥德焉敢  
讓陳乃爲銘曰

赫赫太祖聖厯符祥厥生令女貴異殊常二儀合運  
四德賢良金枝玉葉蕙秀蘭芳降于侯門彭城劉君  
奪瑤圃玉遏至山雲宜家慶國襲美垂勳尋陽公主  
中外咸聞鸞鳳雙口遽愴分飛人間永別冥路旋歸  
陰雲颭颭夜雨霏霏泉扃一閉無復閨闈

石刻

雷嶽

嶽仕南漢事三主厯官御書院給事

匡真大師塔銘

詳夫水月定形覺浮生之可幻火蓮發艷知覺性之  
宜修故妙果圓明寂爾而不生不滅真如常住湛然  
而無去無來祛其華則是色皆空存其實則衆魔咸  
折亦由山藏白玉泥塗不能汙其珍沼出青蓮塵垢  
不能染其質者也故匡真大師業傳西裔性達南宗  
戒珠朗而慧日融光覺海揚而慈霖普潤示非法無  
法之說若電翻輝應真空不壅之談如鍾逐扣以心  
唯清淨道本慈悲常挑智慧之燈洞照昏衢之路將  
使化周有截終期證後無爲故我釋迦如來厭綺羅

絲竹之音痛生老病死之苦踰金城而學道依檀持  
而修真六載成功萬法俱熟爲四十九年慈父演八  
萬四千法門現千百億化身

此句似衍一字

遍娑婆世界說

多多緣起開種種導門誓化迷淪令超正覺于時求  
法寶者是諸沙數得道者於意云何小則證須阿洹  
斯陀含大則超阿羅漢辟支佛卷舒自在蓮花中藏  
十二音聲變現無窮芥子內納三千國土邇後化緣  
將卒示滅雙林卽以法服衣傳于迦葉葉傳阿難難  
傳商和那修修傳優波毼多如此展轉相傳俾令常  
住世不滅矣洎至曹侯溪大圓滿至真起覺大師是

爲第三十三世祖若祇認達磨禪師傳衣法至于曹  
溪則中華推爲第六祖焉故西來智藥三藏駐錫曹  
溪云一百七十年後當有無上法寶肉身菩薩于曹  
溪興化學道者如林故號曹溪爲寶林自祖師成等  
正覺後現一百六十九口生身菩薩遍在諸方行化  
邇后得道莫知其數皆曹溪之裔也故匡真大師嗣  
于一葉焉師諱文偃姓張氏晉王岡東曹參軍翰十  
三代孫也翰知世將泯見機休緣徙于江洲故胤及  
我祖生于蘇州嘉興郡師幼慕出塵乃棲于嘉興空  
王寺志澄律師下爲童凡諸經無煩再閱及長落髮

具足于常州壇後侍澄公講數年頃家四分指歸乃  
辭謁睦州道蹤禪師則黃蘗之派也一室常閉四壁  
唯空或復接人無吝仁思師卷舒得志徑往扣門禪  
師問誰師曰文偃師關門云頻頻來作什麼師云學  
人已事不明禪師曰秦時轆轤鑽以手托出閉門師  
因是發明又經數載禪師以心機祕密關鑰彌堅知  
師終爲法海要津定作禪天朗月因語師云吾非汝  
師莫住師遂入閭纔登鷲骨直奪鵬程因造雪峰會  
三禮欲施雪峰乃云何得到詰麼師不移絲髮重印  
全機雖等截流還同戴角由是學徒千餘凡聖莫審

師昏旭參問寒煥屢遷摳衣惟切於虛心得果冥輸  
于實腹因有僧問雪峰云如何是觸目不見道運足  
焉知路雪峰云蒼天僧不明問師師曰三斤麻一疋  
布僧後問於峰峰云嘻我常疑個布衲師於會裏密  
契玄機因是出會遍謁諸山尊宿頗有言句世所聞  
知後雪峰遷化學徒乃問峰佛法付誰峰云遇松偃  
處住學徒莫識其機偃者蓋師名也至今雪峰遺誠  
不立尊宿辛未禮于曹溪旋謁靈樹故知聖大師以  
心機相露膠漆契情歲在丁丑知聖大師一日召師  
及學徒曰吾若滅後必遇無上人爲吾茶毘至戊寅

高祖天皇大帝巡狩韶石幸于靈樹知聖遷化果契  
前約敕爲藝之獲舍利塑形于方丈于時詔師入見  
特恩賜紫次敕師于本州廳開堂師於是踞知聖筵  
說雪峰法實謂禪河涵湧佛日輝華道俗數千問答  
應嚮郡守何公希範禮及曰弟子請益師曰目前無  
異草有人問如何是本來心師云舉起分明別有言  
句錄行于世爾後大師心恬默奏乞移菴敕允癸未  
領學志開雲門山五載功成四周雲合殿宇之簷楹  
翼翥房廊之高下鱗差遂壑幽泉挫暑月而寒生戶  
牖喬松修竹冒香風而韻襍宮商近於三十來秋不



減半千之衆歲納他方之供日豐香積之厨有殊舍  
衛之城何異靈山之會院主師傳大德表奏院畢功  
敕賜光泰禪院額及朱記至戊戌歲高祖天皇帝  
詔師入闕帝問如何是禪師曰聖人有問臣僧有對  
帝曰作麼生對師云請陛下鑒臣前語帝悅云知師  
孤戒朕早欽敬宣下授師左右街僧錄師默而不對  
復宣下左右曰此師修行已知蹊徑應不樂榮祿乃  
詔曰放師歸山可乎師欣然山呼萬歲翌日賜內帑  
香藥施利鹽貨等廻山并加號曰匡真厥後每年頻  
降頒宣繁不盡記恭惟我當今大聖文武玄德大明

至道大廣孝皇帝歲在單閼運聖謨而手平內難奮  
神武而力□中興恩極八紘道弘三教乃詔師入內  
經月供養賜六銖衣一襲香藥施利等而廻并御製  
塔額預賜爲寶光之塔瑞雲之院師自從示衆卓爾  
宗風凡在應機寶賞奇特常一時見衆集久乃云汝  
若不會三十年莫道不見老僧時有三僧一時出來  
禮足師云三人一狀有問禪者則云正好辨有問道  
者則云透出一宗有問祖意者則云日裏看山有纔  
跨門者則以杖打之有時云衆云直下無事早是埋  
沒也迷緣不已豈是徒然畧舉大綱將裨往代師以

法無定相學無准常每修一忌齊用酬二嗣諱

此處字似

有訛師一坐道場三十餘載求法寶者雲來四表得心

印者葉散諸山則知覺路程開雙林果滿諸漏已盡

盡法皆空雖假臥漳未少妨於參問終云虛幻乃示

寂以韜光侍者奉湯師付盃子曰第一是吾着便第

二是汝着便記取遣修表祝別皇王乃自札遺誠曰

吾滅後汝等弗可效俗教着孝服哭泣喪車之禮則

違佛制有紊禪宗也付法于白雲山實性大師志庠

師會下已匡徒衆已酉歲四月十日子時師順世鳴

呼慈舟壞兮輪迴失渡法山摧兮飛走何依緇倫感

薤露之悲檀信動式微之詠宋雲遇處但携隻履以  
無還慈氏來時應召三峰而再出月二十有五諸山  
尊宿具威儀道俗千數送師於浮圖靈容如昔依師  
訓塔于當山方丈內法齡七紀二僧臘六旬六于日  
行雲歛態隴樹無春覩嶽孤猿啼助哀傳之苦穿林  
幽鳥聲添惜別之愁弔客掩襟伫立以泣在會參學  
小師守堅終始荷贊洞契無爲門人淨本大師常實  
等三十六人知事皆明佛性雅得師宗也在京弟子  
報恩寺內供奉七十餘人皆出自宮闈素精道行敕  
賜與師爲弟子法經內僧錄六通大師教中大法師

道聰洞容人門尤精外學也嶽鏤冰藝缺映雪功疎

自愧裴然濫承厚辟編成實性紀彼銘云

師歸何處超然寂然愛河萬頃涉若晴川其恩超四

果難降衆魔迷則衆劫悟則刹那其是色非色真空

則空如水涵象若燭隨風其雖云有佛難窮千佛如

地有芽逢春自出其菩提無種覺花無子妙果如成

有何生死其是法非法恍惚難尋無內無外卽心傳

心其劫名成灰兮邱陵潛燬大海爲田兮人倫斯改

紀師實性兮刻于貞珉龍化會開兮師蹤如在漢大

寶元年歲次戊午十二月一日建南漢金石記

龔澄樞

澄樞南海人幼事南漢先主爲內供奉官累遷內給事後主時遷至內太師

西鐵塔記

玉清宮使德陵使龍德宮使開府儀同三司行內侍監上柱國龔澄樞同女弟子鄧氏三十二娘以大寶六年歲次癸亥五月壬子十七日戊辰鑄造永充供養入緣弟子內給事都監韶州梁延鄂

南漢金石記

鄭敬贊

敬贊南漢大寶中人給事卽監樂昌縣

樂昌黃連山銅鐘記

粵維大寶二年太歲己未七月甲辰十九日林禪院  
住持長老明徽大師賜紫沙門義初鐘一口重四百  
觔勸緣弟子給事郎守內府侍省內府都并監樂昌  
縣事賜紫金魚袋鄭敬贊以七月廿八日

下缺

韶州府志

李托

托封州人事南漢先主爲內府局令後主時累遷內  
太師入宋戮于汴京

東鐵塔記

大漢皇帝以大寶十年丁卯歲勅有司用烏金鑄造

千佛寶塔壹所七層并相輪蓮花座高二丈二尺保  
龍躬有慶祈鳳厯無疆萬方咸使於清平八表永承  
於交泰然後善資三有福被四恩以四月乾德節設  
齋慶讚謹記

南漢金石記

按全文九百八十七所收與此不同

歐陽炯

全唐文八百九十一有傳

蜀八卦殿壁畫奇異記

夫龍圖鳳紀初宣上古之文帝室皇居必蘊非常之  
寶是以書美鍾張之翰畫稱顧陸之蹤代有其人朝



無乏事今上睿政斯齊化溢升平俗登仁壽天惟行  
健動則總覽萬機道法自然靜則無遺一物將欲權  
衡三代拱揖百王宸襟所適諒超化表嘗於大殿西  
門創一小殿藻井之上輪排八卦故以爲號焉其御  
座几案圖書之外非有異於常者固不關於聖慮其  
年秋七月上命內供奉檢校少府少監黃筌謂曰爾  
小筆精妙可圖畫四時花木蟲鳥錦雞鷺鸞牡丹躑  
躑之類周于四壁庶將觀矚焉筌自秋及冬其工告  
畢間者淮南獻鶴數隻尋令貌于殿之間上曰女畫  
遍矣其精彩則又過之筌以下臣末技降階曲謝而

已至十二月三日上御斯殿有五坊節級羅師進呈  
雄武軍先進者白鷹其鷹見壁上所畫野雉連連掣  
臂不住再三誤認爲生類焉上嗟歎良久曰昔聞其  
事今見其人遽令所進呈者引退無至搦損茲壁因  
目筌爲當代奇筆仍令宣付翰林學士歐陽炯紀述  
奇異微臣拜手因得敘其事焉伊昔大舜垂衣作繪  
乃彰於象物宗周鑄鼎觀形可禦於神姦漢號雲臺  
唐稱煙閣圖畫之要史策攸傳公私雖見於數家今  
古皆言於六法六法之內惟形似氣運二者爲先有  
氣運而無形似則質勝於文有形似而無氣運則華

而不實筌之所作可謂兼之不然者安得粉壁之中  
奮霜毛而欲起綵豪之下混朱頂以相親而又觀彼  
白鷹盼乎錦雉儼丹青而可測狀若猥叢掣條縱以  
難停勢將掠地遂契重瞳之鑒假以好生俄回三面  
之仁真疑害物舉斯二類兼彼群花四時之景堪觀  
千載之名可尙稽諸往牒少有通神圖海獸以騰波  
秦朝賈譽畫池龍而致兩唐室垂名至於誤點成蠅  
徒成小巧不成似犬安可勝言況茲殿也迥架昭回  
高臨爽塏瑤池水滿浮鏡裏之樓臺玉樹風輕鑲壺  
中之日月聖上以動詠墳典親講政刑崇制禮作樂

之名極侍問安親之孝允文允武無怠無荒故士有一技一藝皆升陟褒賞如筌者焉激東海之波濤難方聖澤拱北辰之光耀永固皇基誠非末士之常談可紀至尊之所御臣職叨翰苑譽乏儒林因廣聖模聊同畫品恭承宣命實愧菲辭昔廣政十六歲歲次

癸丑十二月記

益州名畫記

詹敦仁

全唐文九百有傳

初建安溪縣記

夫萬戶而置郡千戶而置邑古制也泉之爲郡古矣

小溪場西距漳汀東瀕溟海乃泉之一鎮守也地廣  
二百餘里三峯玉峙一水環迴黃龍內顧以驤騰朱  
鳳後翔而飛翥土之所宜者桑麻穀粟地之所產者  
麋麇禽魚民樂耕蠶治有銀鐵稅有竹木之征險有  
溪山之固兩營之兵額管二千餘人每歲之給經費  
六萬餘貫地實富饒是豈不足以置縣歟敦仁奉命  
以來視事之始旣嘉山川雄壯尤喜人物夥繁思築  
而縣之乃以狀請於郡太守未幾而報可之令下增  
割南安近地新揭清溪美名敬奉以還大懼弗稱矧  
新邑發岡自乾亥而來轉勢從辛兌而入向丙己以

奉離明之化流寅甲以伸震疊之威左環右接如抱  
如懷前拱後植若揖若拜析爲四鄉一十六里通計  
一邑幾三千餘戶梓列以圖卜契我龜當三農收斂  
餘暇適二營番戍休閒便近之戶役止三日而民不  
告勞築作之工計不踰年而兵不憚用崇門豎樓所  
以嚴其勢繩廊周宇所以處其吏屋不華而加壯寢  
僅足以爲安居民鱗次雍雍然以和官廨翼如濟濟  
而有辨由陸而至者必出其塗自水而運者會流於  
下坐肆列邸貿通有無荷畚執筐各安職業土沃而  
人稠風淳而俗樸眞東南形勝之地實疆場衝要之

區也初經營於顯德大火之首冬遂落成於明年小  
春之下斡苟完苟美不至侈矣曰庶曰富又何加焉  
其奈地華人質業儒者寡是豈教有未及者歟殆亦  
有待而化者歟豈知夫秦奢魏褊俗若未易以轉移  
伯清惠和聞者尙能以興起顧在上之人所以作之  
者何如耳敦仁不能遠引古之說以爲喻請以鄉邦  
之事而昌言之可乎爾閩之初人未知學自常公觀  
察以來有歐陽四門者出豈曰彼能而我否孰謂昔  
有而今無蓋未然者猶有所待而然未至者當有所  
勉而至齊變至魯魯變至道盛事鼎來以答山川之

靈雄名日起以續龍虎之號口教之令固不敢不勉而從令之教爾邑之人當交相勸勉以副令之願望猗歟休哉丙辰十月甲辰記

福建通志

### 錢鏐

鏐字輔軒武肅王之弟也累授溫明二州刺史文穆王時除兩浙行軍司馬尋改本州團練使封楚國公開運二年卒諡忠簡

### 康樂巖題記

鏐自庚辰載領郡於康樂巖重剏亭臺遍植花柳兼華蓋山畔建置菓園口口口口添奇章時甲申歲



清明日彭城輔軒記以示後來

兩浙金石志

沈仁衷

仁衷吳越國人事蹟待考

感應塔記

昔者瞿曇氏之化天竺也將宏妙法式振辨才旣演  
暢于峴山俄湧現于靈塔久居多寶契乎宿因純化  
之瑞斯可見矣泊無憂王之治間洲也冥搜舍利遐  
構佛陀括囊于八國之中經營于一日之內被乎世  
界炳若星羅鬼國之憂斯可見矣由是教傳東國法  
仰西方伊塔廟之聿興遂支提而寢廣徵諸善者可

得言之晉義熙二年隱士許詢字元度拂衣俗態脫  
屣浮名捨第宅兩區建迦藍二所其一則營于鏡水  
號曰祇洹其一則立彼蕭山目之崇化迺于餘衍樹  
以浮圖唯乏相輪未全香刹旋于中夜忽邇飛來旣  
道俗而式瞻且規矩而暗合未幾有番僧邂逅繞塔  
踟躕或問其來非無所以乃言國爲天竺寺實菩提  
遽失相輪遍搜印度遂杖錫跋履尋光現眞衆復詰  
之奚以爲證訴以七寶營構諒匪五金作爲驗之不  
誣信矣何爽元度載發宏願當冀來生果克爲王重  
建是塔浮世空嗟于閱水善根有若干移山逮夫梁

武受圖蕭氏命族至岳陽王簪除會稽郡守將欲理棹訪于志公歷彼川塗訣之休咎乃曰今之分命蓋還舊居請詢曇彥上人在彼香巖精舍無何法眼早已經心遂約緇徒伫迎元度數日岳陽適至晝隼爰來夫彼彥師已伺門首乃謂曰許元度來何暮昔日浮圖今如故岳陽王應之曰弟子姓蕭名簪豈許元度耶彥師既知宿命未通豈造次能喻于時延入虛室遽爇名香乃以定慧加之于是斯須恍若豁開疑罔鎮悟前生洞究因緣了在心目俄命同載適彼蕭山爰止舊廬遂禮遺像既現塔中舍利兼騰基上神

光仍于龕室之間採出斧鑿之類且悲且喜于載于  
三尋率俸金別營雁塔不日而就異世合符稽彼感  
通有如影響邇後年祀負遠世故推遷緬層構之冀  
存顧基坻之空在累代而下一簣不留遐考厥出宜  
乎有待吳越監軍節度使渤海公文武傑出忠孝間  
生實惟霸王之心腹久居元舊之爵位中立無倚出  
言有章多重寶綠水紅蓮得夷吾春風夏雨綵衣炳  
煥棣萼芬芳虞潭養堂莫能比興陸凱侯族才足矜  
誇而能屬意真筌靈衿道樹側聞往事載動信心遂  
與蜀國夫人敦琴瑟之情表金石之固同發誠願須

彼勝緣務捨珍財再崇瑞相而乃磨礱文石陶埏埴  
瓦起自戊午年秋初訖于己未歲冬首聳成雙塔並  
建五層其制超今其高邁古事符感微妙盡雕鏤東  
則璀璨瑛瑛樹岳陽之善本西則晶熒赫赫表元度  
之良因其第一層則儼列天人師子石像其第二層  
已上則湧起千佛面于四方衆寶莊嚴五綵繪素聳  
鍊輪而萃漢懸金鐸以鳴風臺類須彌狀侔阿育晉  
代之高蹤不泯梁朝之餘烈重光愚竊思之信可徵  
矣若非公繼許詢前志應蕭簪後身則何得契彼三  
生成茲萬善夫如是亦何必志公復出曇彥重來舉

而論之固其宜矣樹德之盛積善攸歸雅述徽猷稱  
乎琬琰仁衷才疎頌魯學婉游梁摘藻騰芳徒懷鳥  
鳳激波飛譽曷比魚鴈誰謂飾揚罔遺荒墜退讓弗  
克黽勉何多雖銳意于枳園必貽譏于畫虎其詞曰  
粵靈塔之穹崇兮肇多寶之湧現矧阿育王之鬼功  
兮示閭浮之神變禮一念之勤拳闢萬善之關鍵由  
感應之不誣遂祖述之斯薦有許詢之曠達樂蕭山  
之蔥蒨捐爽塏之華居聿莊嚴于秘殿營宰漢之俄  
成慊相輪之未建忽中夜而飛來實衆目之咸見冀  
後世之再逢俾真風之重扇造梁朝于帝族封蕭誓

于禹甸問所適于誌公通宿命于曇彥果宏誓于疇  
昔襲洪固于周遍泊年代之屢遷念頽毀之誰援誕  
明公于海嶽列羣辟于方面鼓琴瑟之克諧捨金玉  
而靡俗樹雙標之聳拔表三生之勇健燦熠熠之金  
容累層層之玉現振象教之罔細開龍華之方便輟  
不退之法輪正無漏之高選惟天上兮人間受豐報  
之宏願

紹興府志

唐文拾遺卷之四十九

榮祿大夫三品頂戴前分巡廣東高廉道加四級臣陸心源輯  
智詵

字惠成俗姓徐益州成都人武德元年終

答某書

辱使至止并以誠言披閱循環一言三復文清淥水  
理破秋毫貧道戒行多闕化術無方宅身荒谷四十  
餘載狎魚鳥侶樵歌習禪那思般若以此卒歲分塡  
溝壑不謂耆年有幸運屬休明伏惟相王殿下德隆  
三古道振百王公攘臂而歸舊里衣錦而旋本邑百



姓有再生之期萬物起息肩之望搢紳君子捧玉帛  
而來儀慷慨丈夫委干戈而伏道昔長卿返蜀徒擅  
清文鄧艾前來未能偃武公華陽甲族井絡名家捧  
日登朝懷金問道劔南長幼竝俟來蘇豈藉微風自  
然草靡當勸諸皆領越境參迎續高僧傳

智首

姓皇甫安定人住西京禪定寺精講戒律貞觀初卒

續薩婆多毗尼毗婆沙序

世雄息化律藏枝分遂使天竺聖人隨部別釋自佛  
教東流年代綿久西土律論頗傳此方然此薩婆多

卽解其十誦智晉宿緣積善早預緇門始進戒品卽  
爲毗尼藏學至於諸律諸論每備披尋常慨斯論要  
妙而文義闕少乃至江左淮右爰及關西諸有藏經  
皆親檢閱悉同彫落罕有具者雖復求之彌懇而緣  
由莫測每恨殘缺滯於譯人靜言思此恒深悲歎比  
奉詔旨來居禪定幸逢西蜀寶玄律師共談此論闕  
義玄言本鄉備有非意聞之不勝慶躍於是殷勤三  
覆問其所由方知此典譯在於蜀若依本翻有其九  
卷往因魏世道武毀滅法門乃令茲妙旨晉末零落  
遂使四方皆傳闕本其真言圓備尙蘊成都智晉乃

託印懋行人井絡良信經涉三周所願方果以皇隋  
之馭天下二十六載大業二年歲次丙寅冬十二月  
躬獲此本傳之京邑智晉深願流茲覺水散此惠燈  
悟彼學徒補其法寶已有一本附齊州神通寺僧沙  
禪師令於海岱之間諸藏傳寫猶恨晉魏燕趙未獲  
流布相州靜洪律師毗尼匠主復是智晉生年躬蒙  
訓導今謹附一本屈傳之河朔故具述由序標之卷  
初願尋覽諸賢無猜惑也

大藏氣  
字函

### 行友

蒲晉沙門入唐召充弘福寺翻譯著已知沙門傳

釋智通論

通姓程河東人大業中卒見幢蓋塔廟曰吾生淨土矣行友爲傳因著論

夫法本不生今則無滅如身實相觀佛亦然因斯以談則三界與一識冥歸生外其涅槃同體又何容淨穢彼此於其間哉則凡夫學人妄情未盡不能齊彼我均苦樂遺欣厭亡是非故須迴向願求標心所詣然後往生耳其實則不然譬猶明鏡現形空谷應聲影響之來豈足遠乎而惑者以暗識生疑謂淨土越度三有超過九定絕域寥廓經途曩遠自非三乘極位及十地聖人積行累功安能生彼何其謬歟觀斯上人雖稟性溫柔爲人清潔其所脩習則福德偏長

定慧之功蓋不足紀直以一生之散善臨命之虛心  
遂能自覩光明親見幢相動搖神象夢感旁人是知  
九品之業有徵十念之功無爽凡我同志豈不勗哉  
若夫尋近大乘脩行止觀察微塵之本際訖一念之  
初源便可荆棘播無常之音梟獍說甚濞之法十方  
淨國未必過此如其眷戀妻孥槃桓弊執營生未朕  
逐物已疲摧百齡於倉卒之間畢一世於遑忙之際  
內無所措外無所恃則長劫冥沒亦奚能自返良可

悲矣

續高僧傳

法琳

全唐文九百三有傳

破邪論

莊周云六合之內聖人論而不議六合之外聖人存而不論老子云域中有四大而道居其一考詩書禮樂之致忠烈孝慈之先但欲攸序彝倫意存敬事君父至德唯是安上治民要道不出移風易俗自衛返魯詎述解脫之言六府九疇未宣究竟之旨案前漢藝文志所紀眾書一萬三千二百六十九卷莫不功在近益俱未暢遠途誠自局於一生之內非迴拔於三世之表者矣遂使當見因果理涉旦而猶昏業報

吉凶義經耶而未曉斯並六合之寰塊五常之俗謨  
詎免四流浩汗爲煩惱之場六趣誼譁造塵勞之業  
者也原夫實相杳冥逾道之要道法身凝寂出玄之  
又玄唯我大師體斯妙覺二邊頓遺萬德斯融不可  
以境智求不可以形名取故能量法界而興悲揆虛  
空而立誓所以現生穢土誕聖王宮示金色之身吐  
玉毫之相布慈雲於鷲嶺則火宅燄銷扇慧風於雞  
峰則幽途霧卷行則金蓮捧足坐則寶座承軀出則  
天主導前入則梵王從後聲聞菩薩儼若朝儀八部  
萬神森然翊衛宣涅槃則地現六動說般若則天雨

四花百福莊嚴狀滿月之臨滄海千光照曜如聚日  
之映寶山師子一吼則外道摧鋒法鼓颺鳴則天魔  
稽首是故號佛爲法王也豈與衰周李耳比德爭衡  
末世孔某輒相聯類者矣是以天上天下獨稱調御  
之尊三千大千咸仰慈悲之澤然而理深趣遠假筌  
蹄而後悟教門善巧憑師友而方通統其教也則八  
萬四千之藏二諦十地之文海殿龍宮之旨古諫今  
書之量莫不流甘露於萬葉垂至道於百王近則安  
國利民遠則超凡證聖但以時運未融致令漢梵殊  
感故西方先音形之奉東國後見聞之益及慈雲卷



潤慧日收光廼夢金人於永平之年覩靈骨於赤烏  
之歲於是漢魏齊梁之政像教勃興燕秦晉宋已來  
名僧間出或神力救世或異迹發人或慧解開神或  
通感適化及白足臨刃不傷遺法爲之更始誌上分  
身員戶帝王以之加信具諸史籍其可詳乎並使功  
被將來傳燈永刼議者僉曰僧唯紹隆佛種佛則冥  
衛國家福隆皇基必無廢退之理我大唐之有天下  
也應四七之辰安九五之位方欲興上皇之風開正  
覺之道治致太平永隆淳化但傳氏所述酷毒穢詞  
並天地之所不容人倫之所同棄恐塵黷聖覽不可

具觀伏惟陛下布含弘之恩垂鞠育之懷審其逆順  
議以真虛佛以正法遠委國王陛下君臨斯當付囑  
謹上破邪論一卷用擬傳詞

續高僧傳  
卷三十二

### 答太宗詔奏

文王大聖周公大賢追遠慎終昊天靡答孝悌之至  
通於神明雖有宗周義不爭長何者皇天無親竟由  
輔德古人黨理而不黨親不自我先不自我後雖親  
有罪必罰雖怨有功必賞賞罰理當故天下和平老  
子習訓道宗德教加於百姓恕已謙光仁風形于四  
海又云吾師名佛佛者覺一切人也軋竺古皇西昇

逝矣討尋老教始末可追日授中經示誨子弟言吾  
師者善入泥洹綿綿常存吾今逝矣今劉李所述謗  
滅老氏之師世莫能知著茲辯正論有八卷畧對道  
士六十餘條並陳史籍前言實非謗毀家國

續高僧傳卷三

二十

詔問臨刃不傷對

自隋季擾攘四海沸騰疫毒流行干戈競起興師相  
伐各擅兵威臣佞君荒不爲正治遏絕王路固執一  
隅自皇王弔伐載清陸海斯實觀音之力咸資勢至  
之恩比德連蹤道齊上聖救橫死於帝庭免滯刑於

都市琳於七日已來不念觀音唯念陛下敕治書侍  
御史韋悰問琳有詔令念觀音何因不念乃云唯念  
陛下琳答伏承觀音聖鑒塵形六道上天下地皆爲  
師範然大唐光宅四海九夷奉職八表刑清君聖臣  
賢不爲枉濫今陛下子育恒品如經卽是觀音旣其  
靈鑒相符所以唯念陛下且琳所著正論爰與書史  
倫同一句參差任從斧鉞陛下若順忠順正琳則不  
損一毛陛下若刑濫無辜琳則有伏屍之痛

續高僧傳卷三

二十

法宣

常州沙門

釋道慶墳銘

余與伊人言忘道狎京輦少年已欣其被他鄉衰暮  
更喜同袍月席風筵接腕晤語吾子經堂論室促膝  
非異人豈意玄穹殲我良友千行徒洒百身寧贖未  
能抑筆聊書短銘其詞曰

十力潛景四依匡世踵德連暉伊人是繼宮牆戒忍  
燈炬禪慧並驅生林分庭安馭論堂揭玉義室芬蘭  
坐威師子眾遶栴檀道潔塵外理析談端四儀式序  
三業惟安穢土機窮勝人現滅帳留餘影車迴去轍

隴月孤照墳泉幽冽竹露暫團松風長切氣運有終  
德音無絕

續高僧傳  
卷十四

釋慧願塢塔銘

余與上人情均道勰君終我疾枕淚眠號素車不馳  
玄壤長隔欲申悲緒聊書短銘方墳在列靈塔斯布  
爰屬勝人允茲崇樹於惟法主人勝德全愛河早越  
心燈幼傳巖嶽一簣哮吼三年青蒲應舉紫極聞天  
名邦仁化利物攸往衢樽日斟懸鏡常朗義海傍溢  
談峯直上誰謂明珠忽潛幽壤神耶掩亢素塔標墳  
瓊龕宿霧玉掌排雲澗松送響巖桂呈芬山飛海運

遷貿相踵火入秦陵書開汲冢惟茲道力巍巖長竦

續高僧傳  
卷十六

元續

事蹟俟考

寶園寺碑銘

老稱聖者莊號哲人持螢比日用岳方塵

續高僧傳  
卷十五

彥琮

全唐文九百五有傳

琮作琮

大唐故左衛翊衛武騎尉王府君墓誌銘并序

君諱行威字國寤其先太原晉陽人也自後因官播

越又爲雍州明堂縣人焉若乃輔嗣談玄潛冲閑放  
纂清徽於遠系繼盛德以追蹤者於王府君見之矣  
祖金朝議郎益州司兵參軍事父師保朝散大夫並  
志尙老莊屏忽名位優遊天地之際託賞風月之間  
爰誕異人乃邦之彥叶媚川而藻性夙著溫恭稟圓  
折以資生弱稱歧嶷起家以門陰補充左衛翊衛提  
戈玉宇荷戟璇輝旣申之以爪牙亦罄之以心膂秩  
滿不仕從私欲也於是孔座陳筵招携於執友牙琴  
嵇玉留連於勝託將謂永貞眉壽天假大年豈期董  
澤先秋榆關遽落以垂拱二年歲次景戌七月己亥



朔十四日壬子遘疾終於頒政里第春秋五十有六  
卽以其年九月戊戌朔五日壬寅歸葬於京兆西南  
龍首之原禮也長子武騎尉義方次子麟臺御書手  
義端等茹荼集蓼懼平海以成田陟岵循陔慮高春  
而徙照敬刊貞琬爲之誌云其銘曰

景胄華宗千霄括地師王友帝懷忠抱義挺生才彥  
有美珪璋留連風月優遊老莊入仕登庸提戈荷戟  
翊奉宸極罄於心迹耶園養性琴酒怡神方希懸解  
遽返天真云亡殄瘁人良殲喪霧黯雲低松高野曠  
勒方礎兮泉之幽紀四序兮有迴周庶滕棺兮照白

日識九原兮栢與楸

常山貞石志

道宣

全唐文九百九有傳

續高僧傳後序

竊以法流所被非人不弘頃世澆漓多乖名實後學  
奔競未志尋籌致混篇章凋殘者衆自梁已後僧史  
荒蕪追討英猷罕有微緒豈非綴緝寡鮮聞見遂沉  
高行明德湮埋難紀輒不崖揆且撥在言至於傳述  
固虧嘉績猶賢絕墜無聞於世所以江表陳統瓊晃  
琰爛之儔河北高都融琛散魏之侶英聲昌於天漢

盛行動於人心並可楷模俱從物故嘗以暇日遍訪  
京賢名尙不聞何論景行撫心之痛自積由來相成  
之規意言道合仰託周訪務盡搜揚勿謂繁多致乖  
弘略世之三史卷餘四百尙有師尋豈喻釋門三五  
表也故當微有操行可用師模卽須綴筆更廣其類  
豈不光聞僧海舟徑聖蹤則釋門道勝顧思齊之有  
日俗流上達增景仰於生常邪輒舒傳末冀期神人  
知有據耳

續高僧傳  
卷四十

簡諸宰輔叙佛教隆替狀

列子云周穆王時西極有化人來反山川移城邑干

變萬化不可窮極穆王敬之若聖此則佛化之初及也朱仕行釋道安經錄云秦始皇時西域沙門十八人來化始皇始弗從禁之夜有金剛丈六人破獄出之始皇稽首謝焉漢書云武帝元狩中開西域獲金人率長丈餘列之甘泉宮帝以爲大神燒香禮拜後遣張騫往大夏尋之云有身毒國卽天竺也彼謂浮圖卽佛陀也此初知佛名相云成帝都水使者劉向云向檢藏書往往見有佛經此卽周秦已行始皇焚之不盡哀帝元壽中使景憲往大月氏國因誦浮圖經還於時漢境稍行齋戒據此曾聞佛法中途

潛隱重此中興後漢明帝永平中上夢金人飛行殿  
前乃使秦景等往西域尋佛法遂獲三寶東傳洛陽  
畫釋迦立像是佛寶也翻四十二章經是法寶也迦  
竺來儀是僧寶也立寺於洛城西門度人開化自近  
之遠展轉住持終於漢祚魏氏一代五主四十五年  
隆敬漸深不聞再毀吳氏江表四主五十九年孫權  
創開佛法感瑞立寺名爲建初其後孫皓虐政將事  
除屏諸臣諫之乃止召僧而受五戒蜀中二主四十  
三年于時軍國謀猷佛教無聞信毀晉司馬氏東西  
立政一十二主一百五十六年中朝四帝崇信之極

不聞異議唯東晉成帝咸康六年丞相王導太尉庾亮薨後庾冰輔政帝在幼沖爲帝出詔令僧致拜時尙書令何充尙書謝廣等建議不合拜往反三議當時遂寢爾後六十二年安帝元初中太尉桓玄以震主之威下書令拜尙書令桓謙中書王謐等抗諫曰今沙門雖意深於敬不以形屈爲禮迹充率土而趣超方內是以外國之君莫不降禮如育王等禮比王之事也良以道在則貴不以人爲輕重如魏文之軾于木漢光之遇子陵等尋大法東流爲日諒久雖風移政易而弘之不異豈不以獨絕之化有日用於陶漸清約之風無時害於隆平者

乎玄又致書廬山遠法師序老子均王侯於三大遠  
答以方外之儀不隸諸華之禮乃著沙門不敬王者  
論五篇其事由息及安帝返政還崇信奉終於恭帝  
有宋劉氏八君五紀雖孝武大明六年暫制拜君尋  
依先政齊梁陳氏三代一百一十餘年隆敬盡一信  
重逾深中原魏氏十有餘君一百五十五年佛法大  
行備見魏收良史唯太武眞君七年聽讒滅法經於  
五載感癘而崩還興佛法終於靜帝自晉失御中原  
江表稱帝國分十六謂五涼四燕三秦二趙夏蜀也斯諸僞政信法  
不虧唯赫連勃勃據有夏州兇暴無厭以殺爲樂佩

像背上令僧禮之後爲震死尋爲北代所吞妻子形  
刻具如蕭子顯齊書高齊在鄴六帝二十八信重  
逾前國無兩事宇文周氏五帝二十五年初武帝信  
重佛法後納張賓之議便受道法將除佛教有安法  
師著二教論以抗之論云九流之教教止其身名爲  
外教三乘之教教靜其心或名爲內教老非教主易  
謙所攝帝聞之存廢理乖遂雙除屏不盈五載身歿  
政移隋氏承運二帝三十七年文帝崇信載興佛法  
海內置塔百有餘州皆發休瑞具如圖傳煬帝嗣錄  
改革前朝雖令致敬僧竟不屈自大化東漸六百餘



年三被誅除五令致拜既乖經國之典又非休明之  
政剝斲之虐被於亂朝抑挫之儀揚於絕代故使事  
理乖常尋依舊轍良以三寶爲歸戒之宗五衆居福  
田之位雖信毀交貿殃咎推移斯自人有衆隆據道  
曾無興廢所以千餘大聖出賢劫之大期壽六萬年  
住釋門之正法況乃十六尊者行化於三洲九億應  
供護持於四部據斯以述歷數未終焉得情斷同符  
儒典且易之蠱爻不事王侯禮之儒行不臣天子在  
俗四位尙有不屈之人況棄俗從道而便責同臣子  
之禮又昊天上帝嶽瀆靈祇君人之主莫不祭饗而

古松又似山開萬仞峯王永州邕曰寒猿飲水撼枯  
藤壯士拔山伸勁鐵朱處士遙云筆下唯看激電流  
字成只畏盤龍走叙機格則有李御史舟云昔張旭  
之作也時人謂之張顛今懷素之爲也余實謂之狂  
僧以狂繼顛誰曰不可張公又云稽山賀老粗知名  
吳郡張顛曾不易許御史瑤云志在新奇無定則古  
瘦灘驪半無墨醉來信手兩三行醒後卻書書不得  
戴御史叔倫云心手相師勢轉奇詭形怪狀翻合宜  
人人欲問此中妙懷素自言初不知語疾速則有竇  
御史冀云粉壁長廊數十間興來小豁胸中氣忽然

絕叫三五聲滿壁縱橫千萬字戴公又云馳豪驟墨  
列奔駟滿座失身看不及目愚劣則有從父司勳員  
外郎吳興錢起詩云遠錫無前侶孤雲寄太虛狂來  
輕世界醉裏得真如皆辭旨激切埋藏元奧固非虛  
蕩之所敢當徒增愧畏耳時大厯丁巳冬十月廿有

八日

宋拓本

### 酒狂帖

酒狂昨日過楊少府家見逸少阮步兵帖甚發書興  
也頗素何可以到此但恨無好紙墨一臨之耳比見  
獻之月儀帖內數字遂與右軍並馳非後人所能到

一點一畫便發新奇一法此乃得鍾繇弟子朱翼三  
過波藏鋒法酒狂見此遂大吐出胸中寬耳千丈早  
晚納去俟楊生縛筆至可爲也茲不具口狂口藏真  
太師丈足下

書畫  
彙攷

### 右軍帖

右軍云吾真書過鍾匠故不減張僕以爲真不如  
鍾草不及張所謂世之所重以其能懷素書之不足  
以爲道其言當不虛也

清化  
閣帖

### 聖母帖

聖母間口主口

似言

口

筆畫  
不全

疾口釋遂奉上清之教

旋登列聖之位仙階崇者靈感遠豐功邁者神應速  
乃有真人劉君擁節乘麟降于庭內劉君名綱貴真  
也以聖母道應寶籙才合上仙授之秘府餌以珍藥  
遂神儀爽變膚骼纖妍脫異俗流鄙違塵愛杜氏初  
怒責我婦禮聖母愴然不經聽慮久之生訟至于幽  
圉拘同羑里倏口字覓裳仙駕降空卿云上缺似臨  
戶顧召二女踐虛同升旭日初照聳身直上旌幢彩  
煥輝耀莫倫異樂殊香口字似沒空方口字似亦康帝以  
爲中興之瑞詔於其所置仙宮觀慶殊祥也因號曰  
東陵聖母家于廣陵仙于東土曰東陵焉二女從升

曰聖母焉邃宇旣崇眞儀麗

似復似投

遠近歸赴傾市

江淮水旱札瘥無不禱請神貺昭荅人用太康姦盜

之徒或未弘

似是引字

咎則有鳥禽翔其廬上靈微旣降

罪必斯獲閭井之間無隱慝焉自昔暨隨年將三百

都鄙精奉車徒奔屬及煬帝東遷運終多忌苛禁道

侶元元九聖丕承慕揚至道眞宮秘府罔不

靈縱可道化在人雖蕪翳荒頽而奠禱雲集棟宇

未復耆艾銜悲誰其興之粵因碩德從叔父懷南節

度觀察使禮部尙書

下空

監軍使太原郭公道冠方隅

勲崇南服淮沂旣作而不朽存乎頌聲貞元九

年歲在癸酉巳月

湖南通志

秋風帖

此相遇極慰積心人情逼深江事來甫爾遂不果歟  
悉海素帖首及江字上下海字上下俱有關文我有數行淚不落十餘年  
今日爲君盡併灑秋風前寶真齋法書贊

律公帖

貧道頻患腳氣異常憂悶也常服三黃湯諸風疾兼  
心中常如刀刺乃可處方數日服不然客舍非常之  
憂耳律公能枉步求貧道顛草斯乃好事也奉覓不  
盡垂悉沙門懷素白同上

一行

全唐文九百十四有傳

請造銅遊儀奏

黃道游儀古有其術而無其器以黃道隨天運動難  
用常儀格之故昔人潛思皆不能得今梁台瓚創造  
此圖日道月交莫不自然契合既于推步尤要望就  
書院更以銅爲之庶得考驗星度無有差舛

唐會要  
四十二

請與星官考校黃道遊儀奏

舜典云在璿璣玉衡以齊七政說者以爲取其轉運  
者爲樞持正者爲衡皆以玉爲之用齊七政之變知



其盈縮進退得失政之所在卽古太史渾天儀也自周室衰微疇人喪職其制度遺象莫有傳漢興丞相張蒼首創律厯之學至武帝詔司馬遷等更造漢厯乃定東西立晷儀下漏刻以追二十八宿相距星度與古不同故唐都分天部洛下閎運算轉厯今赤道厯星度則其遺法也後漢永元中左中郎將賈逵奏曰臣前上傳安等用黃道度日月弦望多合近太史官一以赤道度之不與天合願請太官日月宿簿及星辰晷度與待詔星官考校奏可問典星待詔姚崇等十二人皆曰星圖有規法日月實從黃道官無其

器不知施行甘露二年大司農丞耿壽昌奏以圓儀  
度日月行考驗天運日月行赤道至牽牛東井日行  
一度月行十五度至婁角日行一度月行十三度此  
前代所共知也是歲永元四載也明年始詔太史造  
黃道銅儀冬至日在斗十九度四分度之一與赤道  
定差二度史官以校日月弦望雖密近而不爲望日  
銅儀黃道與度運轉難候是以少終其事其後劉洪  
因黃道渾儀以考月行出入遲速而後世治厯者不  
遵其法更從赤道命文以驗賈逵所言差謬益甚此  
治厯者之大惑也今靈臺鐵儀後魏明元時都匠解

蘭所造規製樸略度刻不均赤道不動乃如膠柱不置黃道進退無準此據赤道月行以驗入厯遲速多者或至十七度少者僅出十度不足以上稽天象敬授人時近秘閣郎中李淳風著法象志備載黃道渾儀法以玉衡旋規則帶日道傍列二百四十九交以推月遊用法頗雜其術竟寢臣伏承旨更造游儀使黃道運行以追列舍之變因二分之一中以立黃道交于軫奎之間二至陟降二十四度黃度之內又施白道月環用究陰陽朧之數動合天運簡而易從足以制器垂象永傳不朽

同上

按全文九百十四所收請與星官考校黃道游儀  
奏至與待詔星官考校止

沙門題

北崇福寺僧

大唐本願寺三門之碑

粵若稽古迦文咨度法界服勤浩劫獲有万德其興  
也勃焉若乃懷竊不可以迷缺宇其可得乎於是給

園宏構作矣本願寺者昔在育王之所建也在趙之

鹿泉鹿泉缺作紀常山爲鎮俯仰形勝爲百城之宗

案育王蓋飛行之帝也以鍊輪爲□□盡有缺惟冈

圖乃分遣鬼雄大建靈塔所殺八萬有四千建塔亦

如之以口罪也口口八國

下缺

遠浸用耶墟殆及有隨

興廢起頓改勝易號建言有之土火之間龍戰於野

緣林新市

下缺

高祖飛龍王室草創以大併小遂遷井

陘太宗位天光復釋舊開皇福地盡舉而存故茲離

正可知也有若法宇禪居率皆增

下缺

天子將有事東

夷誅有罪也中山次飛麴名昉等率六千人忠勇冠

時言從薄伐既其

下缺

天紼縹曷維櫓棹皆廢脇息惶

汗歸懷法王下冀神効一徵樹以遐福既契既拒颯

然而

下缺

循其本乃建斯門崇昔願也視定極絃幅廣

設階分礎下襲粗給獫狁之故其業中斷口上座僧  
道解寺主僧希名都維那僧惠仙等舉寺高德一十  
有四人並戒惠兼廣才明奧曰昔給孤唱始身子演  
成今則不承權輿使懿績長寢上聖默責夫何以安  
之哉乃命下代焉秀師俗姓閩氏燕趙之松栢也神  
宇特發聞思畢舉講唱表正白黑攸歸廼心下筐篚  
蟬聯影從者可勝言哉於是佺班輪徵匠石涉新甫  
輦徂來槎其條枚伐乃下拱若阜聚棼如山口員畢  
符鏤裒無染壯士令勇夫撫鵠梁躡虛絕藻掇植  
下疋阿閣四下赭扉三后海目極視若有意乎往來

皇皇乎有以見大覺之道口

下缺

數百里望而知歸況

其邇者乎其餘綠竹掃砌碧流環冠芙蓉司辰明珠

掌

下缺

秋七月哉生魄刺史仇公克義布政施仁鎮撫

下缺

既下車人悅其德先是閭口阡陌率多湫隘

下缺

常山貞

石志

文器

開元中蜀僧

唐

缺

峯塔院銘

口之有天下也四維廓九服寧海若自晏山戎不聳

詐夫甲子蓋一百廿一載焉

下缺

七聖之不業膺千秋

之昌運卻走馬御飛龍擊天鼓撞地鍾平章百姓叶

和

缺

日爾黎民則我明府清源縣開國子王公預茲

選矣公名口字臣忠其先太原人也周

缺

經綸皇朝

水部員外主爵郎中陳鄂饒潤四州刺史薛國公出

孫前殿中少監司

缺

衣冠列地威望通天龍匣決雲

之鋒鳳臺照膽之鑒北面受制西江烹鮮設五教

缺

塵無以點其厥教肅而成其政嚴而理一歲與人歌

之曰我有權暴王公息之我有

缺

口王公之惠夫政

也善則有頌明乃不欺東里之聲未弭西門之氣不

滅傳云誰嗣弗在

缺

木口口水火兼淫旣小往以莅



人亦大有以成歲也由是百姓足三教興郊垆無猛

獸爲

缺

李聳俗蓮聽於雲韶盲羣徒詢其雪乳且夫

月因指見妙或色彰弗示化城胡憩商路此

缺

乃白

環興四代之慶朱輪列十人之寵善積先哲澤流後

昆代出口口口僧家有陶朱之

缺

端閑德音和雅爰

在胎襁早聞祥奇弱非遊京真童削髮嚴修

缺

三石

口行畢志雲

缺

路輪航八若之原恂恂善誘孜孜匪

懈有若昆季前榮州資官縣

缺

前維州風流鎮

缺

口桐口沔寶碧襲一鳥之慶祉知三鱣之禮經挂黃

綬於東門

缺

西刹口行有序

缺

鄉口愛惠修棕

苑之精廬式憑慈善之力以祐仁明之德觀夫蓮龜

聚日菌閣凝霞崢

缺

鳥假道於罍恩海乙賀翔於檠

梲傍聆地贖俯閱雲根花奪燭龍桂侵陰兔自非

缺

宴也乎輪奐孔熾詭恠殊博前臨月殿釋子鍾梵之

塲卻負雲崗蕪人斧探之

缺

貞珉幢迴立珤炬長明

光光如太白點天裊裊若脩虹貫日瑞花每雨忍草

缺

真趣也况金鋪色設玉字湏鑄幸簡墨以相授寧

謙讓而自

缺

口育王八万帝釋三千紛綸山海煜燿

人天招提有識化

下

金石苑

了空

開元中大雲寺僧

金剛般若石經讚

并序

應知先聖六經古賢百氏鉤深致遠未濟苦集之川  
任化安時終迷滅道之界不如得真自在號正遍知  
教口三乘業宏十度必超生老病死而證常樂我淨  
金剛般若經者佛於十六會中第九會說卽口乘之  
內最上乘也約口有七口地成三四宏誓心有情皆  
度十口口行無德不修應空者見空雖空而不違於  
有應有者知有雖有口不違於空泚相會真利斷四缺  
字依證起說克明極成之義因口口往福量等於虛

空果入無餘□□同乎實際是以弃損身命數積□  
沙惠施珍寶量盈國界方四句□非重比一分而猶  
輕誠可謂出口之妙門至聖之洪範者矣本願寺法  
師智琇者俗姓閻氏石邑人也調心止觀毓德聞思  
行業精純辯才通利百千佛所已種善根十二部中  
能宣奧旨勸化鹿泉縣崇善鄉望五十人等厭生死  
苦□解脫樂革社會而鼎法會扶罪根而種善根月  
取三長齋持八戒同餐法藥共庇禪林□有清信士  
趙仁審者身處俗流心專妙理長者買地不難傾金  
仙人掩塗寧辟布髮愈謂勞生易盡至教難聞雪山

敬師致身充供波喻重道以血灑塵未能剥皮用書

日□□石爲字留此經典多歷歲年

缺五字

有眼□聖

種爰植護念之德可懷覺路□通付屬之功不墜□

□過去已傳蚤鼓之音慈氏當來更續百千之焰雖

理超繫象不□□尋思而意待筌蹄應申於偈讚曰

從定起說果妙因□□精□度□宏四心構慈成室

樹德爲林善吉由悟悲喜難任有大比邱專誠鑽仰

克生眞智能除妄想具定希六對值明兩今若不傳

□將安放勸化諸賢心淨如蓮熏修七最出入四禪爰

刻經典以誨人天同希正法久□宏宣

常山貞石志